

17/03/2024

Aizawl

18:30 Hrs

REGIONAL NEWS

HEADLINES:-

1. Mizoram Lok Sabha bial inthlanna a vote thlak turah polling station 21 te chu venhimna uluk ngai zual (critical polling station) a puan a ni.
2. Aizawl New Market a dawr neitu nizan lama thattu ni a rinhlelh chu Police te'n an man tawh.
3. Special Court (Prevention of Corruption)-in Zirtawpni a eiruk thubuai a thiam loh a chantir CADCA CEM hlui nupui Sujata Chakma hremna naktukah puan a ni ang.
4. Lok Sabha inthlanpui leh state 4 Assembly inthlanpui neih turah inthlan Model Code of Conduct, khauh taka kengkawh turin Election Commission-in thuneitute a hriattir.

<><><>

POLL-PS

Election Commission of India hun ruat anga April ni 19-a Mizoram Lok Sabha bial inthlanna a vote thlak turah polling station 21 te chu venhimna uluk ngai zual (critical polling station) a puan a ni.

Mizoram Election department hotute hnen atanga thudawn danin Koladib district a Kolasib assembly bial chhunga polling station pakhat leh Serlui biala polling station 6, a bikin Assam nena inrina hnaiha awmte chu ven uluk zual ngai-ah puan a ni a. Aizawl district-a Tuivawl assembly bial huamchhunga polling station 3-te bakah Saitual district a Manipur dep Chalfilh biala polling station 3 leh Lengteng biala polling station 2 te chu ven uluk ngai zuala puan an ni baw a. Myanmar ramri dep, Champhai district a Champhai South leh East Tuipui bial a polling station 2 ve ve te chu venhimna uluk zual ngai a ni baw. Hei bakah hian Lawngtlai district Tuichawng biala polling station 2, Rengkashya leh Lukkisury te chu venhimna uluk zual ngai a puan a ni a.venhimna uluk zual a ngaihna chhan hi nikum a Chakma Autonomous District Council inthlan campaign lai a mi 4-in BJP candidate Amit Kumar Chakma an thah vang a ni.

Mizoram Lok Sabha bial inthlanpui lo awm turah hian polling station 9 chu ke a kal ngai leh lirthei luh theih lohna a ni hlawm a. Hetiang polling station hi Mamit district a Hachhek assembly bialah 3, Dampa bialah 1 leh Mamit bialah 2 a awm a. Lunglei district-a Lunglei South leh Thorang bialah Polling station 1 ve ve awmin Lawngtlai district a Lawngtlai West bialah pakhat a awm baw a ni.

Lawng hmang lova tlawh pawh theih hauh loh polling station 14 a awm baw a. Mamit assembly bialah 2, Lunglei district a Thorang bialah polling station 4 leh West Tuipui bialah 6 te a ni a. Lawngtlai district a Tuichawng leh Lawngtlai West assembly bialah 1 ve ve a awm baw a ni.

<><><>

FINANCIAL WOES

Sorkar thar, ZPM sorkar pian ni, nikum December ni 08 leh February ni 14 inkar chhunga sorkarin pawisa a puk tawh zat chu cheng vaibelchhe 193 leh nuai 12 a ni.

Tun hnaia Finance changtu Chief Minister Pu Lalduhoma'n Assembly-a ziaka zawhna a chhan danin Mizoram sum dinhmun siamtha tur hian Mizoram

Resource Mobilization Committee (MRMC) din a ni a, an hnathawh tur zingah sum dinhmun siamthat dan tur chi hrang hrang telh a ni a, committee hian hna a thawk tan mek a ni. Hetih lai hian sorkar hnathawk pension tawh mi 1,193 te chu Sorkarin an dawn tur ang a la pe thei rih lova. Pension tawh an chanvo ang a la pek theih loh hi a vaiin Cheng vaibelchhe zahnih sawmsarih, nuai sawmli paruk, sangkhat zali leh pariat za tling a ni.

<><><>

HOMICIDE

Tuikual South a cheng, Aizawl New Market a a dawr kudam chhunga vawiin chawhma lama thi a hmuh Pi V. Lalhmingthangi thattu ni ngei a rinhlelh Irene Lallawmzuali (34) Ramthar North a cheng mek chu Zemabawk Dinthar veng a a thiannu in atangin vawiin vek khan man a ni.

Home Minister Pu K. Sapdanga'n vawiin chawhnu a chanchinbumite a hrilh danin Pi V. Lalhmingthangi tualthih thu report dawn a nih veleh Police leh Forensic team-te chu ruang awmna dawrah kal ngalin,ngawrh takin hnu chhui nghal a ni a. A hmun a thil awmdan leh he thil thleng chhungchanga thu hriat nei awm angte sawi dan atangin Police team hrang hrang insem darh chuan a titu ni ngei a rinhlelh Irene Lallawmzuali chu man a ni ta a. Tualthattu ni a rinhlelh an man kut atang hian tualthahna atan a hriamhrei hman ni ngei a lang, chemte leh tualthi ta thil neih ni ngei a lang engemawzat man tel a ni bawk. An mi rinhlelh in Police hma a a thusawi atang chuan ama tih ngei ni in a lang tih Minister chuan a sawi bawk a ni.

Vawiin chawhma dar 10 vel khan Pi V. Lalhmingthangi (52) Tuikual South 'B' muala cheng chu Aizawl New Market-a ZV Market building a a dawr chhungah thi a hmuh a ni a. Police hotute hnen atanga Akashvani Aizawl thudawn danin Pi V. Lalhmingthangi thattu hian a dawr rawk a tum avanga in nangchinga that ta mai nge inhre sa an ni tih hriat a la ni lova. Dawr nghah rei chang a neih avangin a pasal hian mutsan mai chang a nei niin an sawi a. Tukinah ina a awm loh avang leh a mobile phone a an biak dawn pawha a lak theih loh avangin an chhungte chu a dawrah hian an va kal a. Pawn lamah lo inkalhin dawr kawngkhar bul vela thisen an hmuh avangin a kalhna chhu chhia-in an lut ta a. Thisen tam tak baw nuai karah thi a hmuh a ni ta a ni.

Pi V. Lalhmingthangi ruang hi Aizawl Civil Hospital-ah vawiin vek khan post-mortem a ni.

<><><>

KHUMTUNG FOOD POISONING

Mizoram Health and Family Welfare hnuaiia Food and Drugs Administration Joint Director Pu Lalsawma'n Khumtung khua a bekang um eisual ni a hriat avanga chhiatna thleng a hmun ngei a chian turin vawiin khan Khumtungah a kal.

Pu Lalsawma'n Akashvani Aizawl a hrilh danin bekang um eisual ni a hriat avanga mi 67 enkawl ngai an awm lai a, bekang um ei ve lo ni a ngaih naute kum 1 leh thla kaw mi thihna chuan a thawng hle a. He thil hi ngaih thutak a ngai hle ni a hria-in Khumtung khua ngei a kal ta a nih thu a sawi. An eisual bekang ei bangte hi Health department hnathawkte'n March ni 11 khan Khumtung atanga la-in endik tura ruahman a ni a, mahse, harsatna eng engemaw vangin an la endik thei lova. Naktuk hian College of Veterinary Sciences, Selesih-ah endik theih beisei a ni. Serchhip a kan Corr C. Lalhminghlua sawi danin thi hi kum 1 leh Thla 9 mi Lalhlansangi, Pu Ramsangmawia fanu a ni

a. a thin a lo khawih pawh hman a, Zirtawpni zan dar 11:45 khan Aizawl civil hospital ah a thi a. Khumtung phurh chhoh a nih hnuah lumen a ni a, Nimin chawhnu dar 1:00 khan vui a ni.

Naute kum 2 pawh la tling lo hian bekang um a ei a rinawm chiah loh thu sawi a ni a. An chhungkua hi bekang ei hnu a an dam loh avangin bekang eisual a nu hnute a hnek vanga hetiang a awm ta hi ni a rin a ni.

Puan tawh angina tun thla ni 9 Inrinni khan Serchhip District a Khumtung khuaah hian Bekang um ei sual in mi 67 in harsatna an tawh a. Heng dam lo zinga 45 chu Khumtung health sub centre aʔangin Damdawi in hrang hrang, State Referral Hospital, Falkawn, Aizawl Civil Hospital leh Trinity Hospital Silaimualah te enkawl tura thawn an ni a. Enkawlna tha zawk dawng tura thawn zawng zawng hi 45 niin an zinga 22 damin an chhuak tawh a, mi 22 te chu Damdawi in hrang hrangah an la awm ani.

State Referral Hospital a awm Pi Lalremruati kum 42, Pu Lalthanauva nupui chu a dinhmun ʔha lo in a la harh chhuak thei lova. State Referral Hospital a awm bawh Alfred Lalbiaktluanga kum 12 Pu R.Lalramzauva fapa pawh ʔha lo in zai hmabakin a la awm mek bawh.

Baktawnga Bekang umtute hi UPC Mizoram nu ho LAD te niin, Vanduaina tawka boral Laliansangi pawh hi he kohhran chhungkua a mi tho hi a ni.

<><><>

QUANTUM OF PUNISHMENT

Aizawl a Special Court (Prevention of Corruption)-in Zirtawpni a eiruk thubuai a thiam loh a chantir tak Chakma Autonomous District Council (CADC)-a CEM hlui thi tawh Buddha Lila Chakma nupui Sujata Chakma hremna chu naktukah puan a ni ang.

Special Judge Dr. HTC Lalrinchhana chuan Zirtawpni khan Sujata Chakma hi IPC section 409/420 leh 120 B bakah Prevention of Corruption Act, 1988 section 13 (2) r/w 13 (1)(c) leh (d) leh IPC section 120B hmangin thiam loh a chantir a. Judicial custody-a dah tura thupek siamin naktuk hian a hremna chungchang ngaihtuahna-ah court-ah hruai leh a ni ang. He thubuai a mawhphurtu a puh Buddha Lila Chakma erawh chu a thubuai ngaihtuah laiin nikum October ni 10 khan a thih avangin court thutlukna-ah a lang ve ta lo a ni.

He thubuai lo intan dan chu - Kum 2012 khan Finance Commission 13-na chuan CADC Session Hall sakna a tan cheng nuai 300 a ruahman a, he cheng nuai 300 ruahman ah hian cheng nuai 232 hi Mizoram sawrkar in CADC kutah a pe a ni. CADC chuan Pu R. Vanlalhluna, Edentharr Veng, Aizawl chu cheng nuai 250, sing 6, sang 3 leh 138 hmanga he hna hi thawk turin March ni 14, 2013 khan inremna an siampui a, he hna hi March ni 14, 2015 a thawk zo tura inremna hi siam a ni. Contractor-in a thawhna sum thawh hnihna a dawn hma deuh in chutih hunlaia CADC a CEM lo ni ta Buddha Lila Chakma chuan he hna hi contractor Pu R. Vanlalhluna hnen atanga chhuh sakin a nupui Pi Sujata Chakma chu inremna 'Power of Attorney' (Deed of Agreement) hmangin a thawh chhonzawmtir a, court-a thuhretute thusawi atanga tarlan a nih dan chuan Pu Buddha Lila Chakma hian contractor hnenah hian harsatna hrang hrang siam lui in, dan anga a thawh tur ang bak pawh a thuneihna hmang sual in thawh luih tir a tum thin a, contractor Pu RV Hluna pawh hian Buddha Lila Chakma nupui Pi Sujata Chakma hnenah hna hi pe lo thei lo dinhmun ah a ding ta a ni.

He thubuai chhuitute'n court-a an sawi dan chuan he CADC Session Hall sak hna hi Sujata Chakma leh a pasal Pu Buddha Lila Chakma te hian an chawlhsan chawp chilh mai a, chutihlaiin Pi Sujata Chakma hian pawisa hi tum hnih dawngin a vaiin cheng nuai 48 leh sing 6 zet a dawng thung. Sujatha Chakma te nupa pawisa eiruk hi a tlem berah cheng nuai 34, sing 6, sang 6 leh 585 ni a chhut a ni.

<><><>

ECI ISSUES DIRECTIVES

Lok Sabha inthlanpui leh state 4 Assembly inthlan neih dan tur puan anih hnuah Election Commission chuan inthlan Model Code of Conduct, khauh taka kengkawh tura hriattirna a chhuah a, hemi chungchanga Cabinet Secy, state Chief Secy-te leh Chief Electoral Officer-te hnena lehkha a thawna Commission chuan sorkar hmun hmaa poster leh lehkha tarte leh thu inziakte chu inthlan puan atanga darkar 24 chungin lak thlak emaw tih reh emaw vek tur anih thu a tarlang a, rel station, bus stand leh vantlang hmuna political party fakna lam hawi thu inziak leh tarte chu inthlan puan atanga darkar 48 chungin lak thlak vek tur anih thu a tarlang bawk.

<><><>